

**Uunga siunnersuut: Aningaasarsianit akileraarutit pillugit Inatsisartut inatsisaata allanngortinneqarneranik Inatsisartut inatsisaat nr. xx, xx. xxx 2015-imeersoq**

(Selskabit akileraarutaannik akiliisussaatsinnginnissaq, aningaaseriviit annaasassanut immikkoortitsisarnerat aamma tamakkiisumik akileraaruteqartitsinermut aqqissuussinerup allanngortinneqarnera)

(Aningaasaqarnermut Aatsitassanullu Naalakkersuisoq)

**pillugu**

**Aningaasaqarnermut Akileraartarnermullu Ataatsimiititaliap**

**ISUMALIUTISSIISSUTAA**

**Siunnersuutip aappassaaneerpeqarnerani saqqummiunneqartoq**

Aningaasaqarnermut Akileraartarnermullu Ataatsimiititaliap suliarinninnermini ukuninnga inuttaqarpoq:

Inatsisartunut ilaasortaq Jens Immanuelson (Siumut) siulittaasoq

Inatsisartunut ilaasortaq Steen Lynge (Atassut) siulittaasup tullia

Inatsisartunut ilaasortaq Jess Svane (Siumut)

Inatsisartunut ilaasortaq Tillie Martinussen (Demokraatit)

Inatsisartunut ilaasortaq Naaja H. Nathanielsen (Inuit Ataqtigiiit)

Inatsisartunut ilaasortaq Sara Olsvig (Inuit Ataqtigiiit)

Inatsisartunut ilaasortaq Peter Olsen (Inuit Ataqtigiiit)

UKA 15-imi siullermeerinninnerup kingorna ataatsimiititaliap siunnersuut misissorpaa.

**1. Siunnersuutip imarisaa siunertaalu**

Siunnersuut una pingasunik immikkoortoqarpoq.

**1. Akileraartussaanninneq**

Aatsitassarsiornermut inatsit naapertorlugu akuersissutinut tunniunneqartunut maannakkut pisartutuulli assingusumik erngup nukissiornermut inatsit naapertorlugu akuersissutinut tunniunneqartuni ingerlatseqatigiiffinnut akileraarusiisarnermik taarsiisussamik akiliuteqartarnerup aalajangersaavigisinnaanissaa periarfissinniarlugu akileraartarnermik inatsimmut allannguutissatut siunnersuummik saqqummiussinissaq UKA 2012/113-imi Inatsisartunit taperneqarpoq.

Erngup nukissiornermut inatsit naapertorlugu akuersissutitut tunniunneqartuni ingerlatseqati-giiffinnut akileraarusiisarnermik taarsiisussamik akiliteqartarnerup aalajangersaavigisinnaa-nissaa Naalakkersuisut siunnersuutigaat. Taamaattumillu aningaasarsianit akileraarutit pillugit Inatsisartut inatsisaanni nr. 12-imi, 2. november 2006-imeersumi kingullermillu Inatsisartut inatsisaatigut nr. 10, 29. november 2013-imeersukkut allangortinneqartumi ima allangui-soqassaaq:

1. § 3, imm. 3 ima oqaasertaqassaaq:

”Imm. 3. Selskabinik suliffeqarfinnillu, aatsitassat pillugit ingerlatallu tamatumunnga pingaarutillit pillugit Inatsisartut inatsisaat naapertorlugu aatsitassanik iluaqutiginninniarinnaanermut imaluunniit erngup nukingata innaallagissiornermut atorneqarnera pillugu Inatsisartut inatsisaat naapertorlugu akuersissuteqarfigineqarsimasunik akileraaruseruineq, aatsitassarsiornissamut pisinnaatitaaffeqalersup akuersissutaani aalajangersakkat malillugit, atorunnaassaaq”.

Siunnersuut erngup nukingata innaallagissiornermut atorneqarnera pillugu Inatsisartut inatsisaanni § 12-imut atatillugu isigineqassaaq.

2. Annaasassanut immikkoortitat

Siunnersuutip immikkoortuata appaa aningaaseriviit taarsigassarsiniartarfiillu akiitsulinnit annaasaasa ilanngaatigineqarsinnaanerannut tunngavoq.

Aningaaseriviit periuseq malillugu taarsigassarsiarititigut annaasassanut immikkoortitanik akileraarutitigut sunniuteqartussamik ilanngaateqarnissamut periarfissaqarput. Aningaaserivinnut taarsigassarsiniartarfinnullu immikkut aaqquissuussineq taanna manna tikillugu inatsisitigut aalajangersagaanngilaq. Pineqartoq annaasat ilanngaatigineqartarneranni periutsinit nalinginnaasunit allaassuteqangaatsiarmat allaassutip inatsisikkut aalajangersaavigineqar-nissaa Naalakkersuisunit eqqornerpaasorineqarpoq.

Annaasanik immikkoortitanillu naatsorsuutitigut akileraarutitigullu nalunaarsuinerit allan-guinikkut ataqatigiinnerulernissaat Naalakkersuisunit kissaatigineqarpoq.

3. Tamakkiisumik akileraaruteqartitsinermit aaqquissuussineq

Tamakkiisumik akileraaruteqartitsinermit aaqquissuussinerup siunertaraa akileraaruserinermik allaffissornerup nunanit allaniit suliartortut ilaannut tunngatillugu pisariinnerutinnissaa. Pisariinnerunera tassaavoq pineqartut aningaasarsiamik tamarmiusut 35 procentii inaarutaasumik akileraarutitut taamaallaat akilertussaagaat aammalu sulisut nammineerluni nalunaarsuiffin-nik akileraaruseriffimmu nassiussisussaannigitsut. Akileraarutissanik naatsorsuinermit inum-mut ilanngaat, ernianut aningaasartuutit il.il. eqqarsaatigineqartussaannigillat.

Siunnersuutigineqarpoq tamakkiisumik akileraartartut 350.000 kr.-init ikinnerusunik aningaasarsiallit Kalaallit Nunaata avataaneersuneersunit erniatigut isertitaat ernianullu aningaasar-

tuutaat kiisalu iluanaarutisiaat akileraaruserneqartassanngitsut. Aningaasarsiat allat maannamutut akileraaruserneqartassapput. Aningaasarsiat ilanngaatitaqanngitsumik akileraaruteqaataasussat 350.000 kr.-iuppata amerlaneruppataluunniit, taava Kalaallit Nunaata avataaneersuneersunit erniatigut isertitat ernianullu aningaasartuutit kiisalu iluanaarutisiaat maannamutut akileraaruserneqartassapput. Tamakkiisumik akileraaruteqartitsinermut aqqissuussinermik pisariillisaaneq akileraaruseriffiup nammineerluni nalunaarsuiffinnik misissuilluni inaarutaasumillu naatsorsuutinik nassiussuilluni allaffissorneranut millisaataassaaq.

## 2. Ataatsimiititaliap siunnersuummik suliarinninnera

1 pillugu. Akileraartussaanninneq.

Aalajangiiffigisassatut siunnersuut una taamani Inuussutissarsiornermut Aatsitassanullu Naalakkersuisuusumit saqqummiunneqartoq Inatsisartunit ulloq 26. november 2012-imi akuerineqarpoq:

**”Sinaakktissatut atugassiinerit piumasaqaatillu makku aallaavigalugit Maniitsup eqqaani erngup nukissiornermik tunngaveqarluni aluminiumik suliniuumut tunngatillugu Alcoa Inc.-imik oqaloqatiginninnermik nangitsinissamut Naalakkersuisut pisinnaatitaanissaat pillugu Inatsisartunit aalajangiussissutissamut siunnersuut.”**

Siunnersuutip taasissutissartaani siunnersuummut sinaakktissatut atugassiinerit piumasaqaatillu taaneqartut allattorsimaffianni immikkoortut tallimaanni ima allassimavoq:

**”5. Akileraartarnermik inatsisilianik aamma erngup nukissiornermut inatsimmik allannguinerit:** Aatsitassarsiornermut inatsit naapertorlugu akuersissutinut tunniunneqartunut maannakkut pisartutuulli assingusumik erngup nukissiornermut inatsit naapertorlugu akuersissutinut tunniunneqartuni ingerlatseqatigiiffinnut akileraaruserneqartarnermik taarsiisussamik minnerpaamik assingusumik annertussuseqartitamik akiliuteqartarnerup aalajangersaavigisinnanissaa siunertaralugu periarfissiiniarlutik akileraartarnermik inatsisilianik aamma erngup nukissiornermut inatsimmik allannguuteqarnissamut Naalakkersuisut UPA 2013-imi siunnersuummik saqqummiussaqaassapput. Suliniut sanaartornerup nalaani naqissusiinikkut akitsuusersorneqassanngilaq.”

Akiliutissat akileraaruteqartitsinnginnissamut atatillugu aalajangersarneqartussat akileraarusernertulli minnerpaamik artukkiinissaannik piumasaqaatit siuliani taaneqartut siunnersuutikkut eqquutsinneqarnersut siunnersuummi allassimanninnera siunnersuummik matuminnga siullermeerinninnermi apeqputigineqarpoq. Suliassaqarfimmut Naalakkersuisup apeqput taanna siunnersuummik siullermeerinninnermi akisinnaanngilaa. Apeqputip tamatuma paasinarsinneqarnissaa assorsuaq pingaaruteqartutut ataatsimiititaliamit isigineqarpoq, tassa taanna akileraaruteqartitsinnginnissaq pillugu aalajangiinnermi sinaakkusiussatut atugassarititanut piumasaqaatinullu immikkut ilaatinneqarmat.

Taamaattumillu akiliutissat ingerlatseqatigiiffiit akileraarutaannut taartaasussat minnerpaamik taama annertutigisumik artukkiinissaat siunnersuutip matuma immikkoortuatigut 1-ikkut akileraaruteqartitsinnginnissamat tunngasukkut qanoq ililluni qulakkeerneqassanersoq pillugu apeqqut 31. oktober 2015-imi allagaqarluni Aningaasaqarnermut Akileraartarnermullu Ataatsimiititaliap Naalakkersuisunut allakkatigut akeqquaa.

2 pillugu. Annaasassanut immikkoortitat

Aningaaseriviit taarsigassarsiniartarfiillu periuseq malillugu taarsigassarsiarititigut annaasassanut immikkoortitanik akileraarutitigut sunniuteqartussamik ilanngaateqartarnerannik periutsip atuuttup qulakkeerneqarnissaa aalajangersakkakut tassuuna siunertarineqarpoq. Aningaaserivinnut taarsigassarsiniartarfinnullu immikkut aaqqissuussineq taanna manna tikillugu inatsisitigut aalajangersagaangilaq. Taamaalilluni inatsisitigut qulakkeerneqarpoq naatsorsuuserinermi inatsisitigut maleruagassat Finanstilsynimit aalajangersarneqartut, aningaaseriviit taarsigassarsiniartarfiillu annaasassanut immikkoortitsinerinut atuuttut aammattaaq akileraarutitigut naatsorsuuserinermi maanna tunngaviusussanngornerat.

Tamanna ataatsimiititaliamit naapertuuttut isigineqarpoq, tassungalu atatillugu peqatigisaanik naatsorsueriaatsip assigiiaartup atorneqarnissaata qulakkeerneqarnera naammagisi-maarlugu oqaatigissavaa. Ilangaatigineqarsinnaatitaasut aalajangersakkakut allangortinneqanngillat. Annaasassanut immikkoortitat ilanngaatigineqarnissaanni suli tunngavissaa-tinneqarpoq immikkoortitsinermi annaasassat tassaassasut akileraartarnermut inatsimmi maleruagassat nalinginnaasut naapertorlugit ilanngaatigineqarsinnaatitaasut. Immikkoortitat annaasaqarnermik kinguneqanngippata ukiumi akileraarfiusussami annaasaqarfiunngitsumi isertitatut nalunaarneqassapput. Kiisalu ukiumi immikkoortitsiffiusumi immikkoortitat ukiup tulliani isertitatut ilanngunneqartarnerat naatsorsuuserinermi inatsisitigut qulakkeerneqarpoq, taamaalillunilu immikkoortitat ingerlaavartumik naatsorsorneqartarnissaat qulakkeerneqar-luni.

Naatsumik oqaatigalugu annaasat pineqartut akileraarutitigut naatsorsuutinut qaqugukkut ilanngunneqartarnissaasa assigiissaariffigineqarnissaat siunnersuummi siunertaavoq. Taa-maattumillu siunnersuutip iluanaarutinut tunngatillugu kingunerisassai pillugit allatut nalili-nissamat ataatsimiititaliaq tunngavissaqanngilaq.

3 pillugu. Tamakkiisumik akileraaruteqartitsinermit aaqqissuussineq

Erniatigut isertitat ernianullu aningaasartuutit kiisalu Kalaallit Nunaata avataaneersuneersunit iluanaarutisiaat akileraaruserneqartarnerisa atorunnaarsinneqarnera.

Siunnersuutigineqarpoq tamakkiisumik akileraartartut 350.000 kr.-init ikinnerusunik aningaasarsiallit Kalaallit Nunaata avataaneersuneersunit erniatigut isertitaat ernianullu aningaasartuutaat kiisalu iluanaarutisiaat akileraaruserneqartassanngitsut. Aningaasarsiat ilanngaatitaqanngitsumik akileraaruteqaataasussat 350.000 kr.-iuppata amerlaneruppataluunniit, taava Kalaallit Nunaata avataaneersuneersunit erniatigut isertitat ernianullu aningaasartuutit kiisalu iluanaarutisiaat maannamutut akileraaruserneqartassapput.

Aalajangersagaq inunnut aningaasarsianit akileraarutit pillugit inatsimmi § 72, imm. 1-imi taaneqartunut atuutissaaq. Tassani taaneqarput inuit akileraartussaataitasut atorfeqartitaanerminnut ataatillugu ingerlatani sulianik, sanaartornermik sulianik aammalu ikkussuinermik ivertiterinermilu illoqarfiit nunaqarfiillu piusut avataanni sanaartornermik suliaqartut, aammalu qaammatip siuliini arfinilinni kingullerni nunami maani kommunimut akileraartussaataitasimangitsut. Aningaasarsianit pissarsiarineqartunut tunngatillugu akileraartussaa-titaaneq inaarutaasumik naammassineqassaaq akileraarutitut akiliutaasutigut.

Aningaasaqarnermut Akileraartarnermullu Ataatsimiititaliap paasivaa aalajangersagaq inun-nut inatsimmi tassani § 72 b, imm. 1-imi taaneqartunut atuutissanngitsaq. Tassani inuit atorfeqartitaanerminnut atatillugu annertunerpaamik suliassanik, aatsitassat pillugit ingerla-tallu tamatumunnga pingaaruteqartut pillugit misissueqqaarnermut, misissueqqissaarnermut imaluunniit aatsitassanik iluaqutiginninnermut attuumassuteqartut aalajangersimasuuneru-sunik suliaqartut taaneqarput.

Akileraaruseriffiup nammineerluni nalunaarsuiffinnik misissuilluni inaarutaasumillu naatsor-suutitik nassiussuilluni allaffissornerata annikillisarnissaa tamakkiisumik akileraaruteqartitsi-nermut aaqqissuussinermik pisariillisaanermi siunertaasq ataatsimiititaliamit paasineqarpoq. Taamaattumillu § 72 a aammalu § 72 b malillugit tamakkiisumik akileraaruteqartinneqartartut immikkoortinneqarnerat kiisalu aaqqissuussinerup tamakkiisumik akileraartartut 350.000 kr.-init ikinnerusunik aningaasarsialinnut atuutsinneqarnissaanik piumasaaqat Namminersorlutik Oqartussat sulisunik aningaasanillu atuinerisa iluanaarutissatullu naatsorsuutigineqartut oqimaaqatigiissarnissaat taamaallaat siunertaralugu aalajangersarneqartut ataatsimiititaliamit naatsorsuutigineqarpoq.

Siunnersuutip aappassaaneerpeqarnerani tamanna Naalakkersuisunit oqaaseqarfigineqassasq Aningaasaqarnermut Akileraartarnermullu Ataatsimiititaliamit kissaatigineqarpoq?

#### Nammineerluni nalunaarsuiffik pillugu

Inuk imm. 1-imi imaluunniit 5-imi aammalu § 15, imm. 4-mi taaneqartunik taamaallaat aningaasarsiaqaruni akileraaruserinermik ingerlatsineq pillugu Inatsisartut inatsisaanni § 16 apeqqutaatinnagu nammineerluni nalunaarsuiffimmik tunniussinngissinnaavoq. Aalajangersa-gaq taanna aningaasarsianit pissarsiarineqartunut tunngatillugu akileraartussaataitanerup akileraarutitut akiliutaasutigut inaarutaasumik naammassineqarnissaanik siuliani paasissu-tissiissutigineqartumut naapertuussorinarpoq. Tamatuma saniatigut tamakkiisumik akileraa-riteqartitsinermit aaqqissuussinermik pisariillisaanikkut akileraaruseriffiup nammineerluni nalunaarsuiffinnik misissuilluni inaarutaasumillu naatsorsuutitik nassiussuilluni allaffissor-nerata annikillisinneqarnissaa Naalakkersuisunit naatsorsuutigineqarpoq.

### **3. Siunnersuutip aningaasatigut kingunerisassai**

Siunnersuut annertunerusunik kinguneqartussatut naatsorsuutigineqanngilaq. Allatut nalili-nissamut ataatsimiititaliaq tunngavissaqanngilaq.

#### 4. Ataatsimiititaliap inassuteqaatai

Siunnersuut Inatsisartunit akuerineqassasoq **Aningaasaqarnermut Ataatsimiititaliami amerlanerussuteqartut Siumup, Atassutip Demokratillu ilaasortaataa inassutigaat.**

Ataatsimiititaliami ikinnerussuteqartut Inuit Ataqtigiit ilaasortaataat siunnersuut pillugu ima oqaaseqaateqarumapput:

Inuit Ataqtigiinniit inatsisissamut siunnersuummi § 3, imm. 3 ima oqaasertaqartoq ajornartorsiutitaqartipparput: “Selskabinik suliffeqarfinnillu, aatsitassat pillugit ingerlatallu tamatumunnga pingaarutillit pillugit Inatsisartut inatsisaat naapertorlugu aatsitassanik iluaqutiginninniarsinnaanermut imaluunniit erngup nukingata innaallagissiornermut atorneqarnera pillugu Inatsisartut inatsisaat naapertorlugu akuersissuteqarfigineqarsimasunik akileraarusersuineq, aatsitassarsiornermut pisinnaatitaaffeqalersup akuersissutaani aalajangersakkat malillugit, atorunnaassaaq.”

Inuit Ataqtigiit isumaat naapertorlugu una Inatsisartut 2012-imi ukiakkut aalajangigaannut, Naalakkersuisuniillu innersuussutigineqarsimagaluartumut, uniuuttuuvoq. Taamanikkut Inatsisartunit akuersissutigineqarpoq ingerlatsiviit ilaat ingerlatseqatigiinnik akileraartitsisarnermit pinngitsoortinneqarsinnaasut taarsiullugulu akiliutaasartumik pisussaaffilerneqarsinnaasut. Taamanikkut Naalakkersuisuusut aamma inuussutissarsiutinut ataatsimiititaliaasut akiliutaasartoq taanna ingerlatseqatigiit akileraarutaannit annikinnerussanngitsoq erseqqissarpaat. Taamatulli piumasaqaateqarneq manna Naalakkersuisunit naalakkersuisooqatigiittuniillu qaangiataarneqarpoq. Tamanna tupaallannartuullunilu pakatsinartuuvoq. Eqqaasitsissutigissavarput taamanikkut 2012-mi Naalakkersuisuusut ima oqaaseqarsimmata.

([http://inatsisartut.gl/dvd/EM2012/pdf/media/627954/pkt113\\_em2012\\_alcoa\\_bet\\_2beh\\_dk.pdf](http://inatsisartut.gl/dvd/EM2012/pdf/media/627954/pkt113_em2012_alcoa_bet_2beh_dk.pdf)):

*Ingerlatseqatigiinnik akileraartitsisarnermut tunngatillugu tamanna periutsitigut akileraartarnermik inatsisaasut allanngortinnerisigut akiliutaasartumut allanngortinneqarsinnaassaaq, ingerlatseqatigiinnut akileraarummik taarsiinissamut erngup nukinganik atuisinnaanermik akuersissummut akiliutaasartussanik aalajangersaanissamut tunngavissiisogassalluni - soorlu ullumikkut taamatut akiliutaasartunik malittarisassianik inissiinissamut aatsitassarsiornermut inatsit naapertorlugu akuersissutini periarjissaqartuusoq. Taamatut ilusiliap akuersissuteqarfiusumi tamarmi ingerlatseqatigiiffimmut akileraarutit qaffaavigineqarnissaannut assiaqutsissiisutaassaaq.*

*Ingerlatseqatigiiffinnut akileraartitsisarnermit akiliutaasartumut allanngortitsinissamut Naalakkersuisut peqataarusupput. Ilusiliaq tassaavoq erngup nukissiorjittaq aamma aluminiumik aatsitserivik ingerlatsivimmit Kalaallit Nunaanni nalunaarsugaasumit ataasiinnarmut ingerlanneqassanera, taannalu sinneqartoorutaasunik tunngaveqartunik akiliuteqartassalluni. Taamatut iluarsisooqarnerup akileraartarnermut aamma erngup nukissiornermut inatsisini iluarsiinissat pisariaqartissavai.*

*Allanik pisaqarani ingerlatseqatigiiffimmit ataatsimit appasinnerusumik akileraartarnissamik*

*kissaatigisanik Naalackersuisut akuersinissaminnut siunniussaqaanngillat, taamaaliornermi immikkut ittunik akileraartarnermut tunngasunik ajunngitsorsinissat pillugit ingerlatseqatigiiffiit allat aamma piumasqaateqarnissaannut annertuumik aarleqqutaasumik nas-sataqartitsisinnaavoq. Tamatuminnga kingunerisassat Nunap Karsianut annertuupilus-suusinnaassapput. "*

Inuit Ataqatigiinniit nunatta unammillersinnaassuseqarnerulernissaa inuussutissarsiutinullu aalaakkaasunik atugassaqaartitsinissaq sulissutigerusuppagut. Maannakkulli Naalackersuisut allatut isummernerminnut nassuiaateqarsinnaasimanngillat, maannalu ukiut pingasut matuma siornatigumut pisut sutigut allaanerunerannut tunngavilersuutitik saqqummiussisimanatik. Taamaattumik siunnersuutip itigartinneqarnissaanik Inuit Ataqatigiinniit inassuteqarpugut, pingajussaaneerneqarnerani akiliutaasartup ingerlatseqatigiinnik akileraartitsisarnermit minnerpaamik annikinnerusuunnginnissaanut Naalackersuisut allannguutissamik saqqummiusseriataanngippata. Taamaattoqanngippat "naqqanut ingerlalertornissaq" ernummatigaarput, tassa ingerlatseqatigiit sapinngisamik minnerpaamik akiliuteqartarnissartik sulissutigilissammassuk. Inuit Ataqatigiinniit isumaqarpugut ingerlatseqatigiit akiliutissamik annertususaannik naapertuussorisaminnullu ilisimannittuutillutik akileraarutitigut akiliutissatigullu akiliinissaminnut tunuarsimaarneq ajortut. Tamatumalu saniatigut ingerlatseqatigiiffinniit allannguajaassuseqarneq pingaartinneqartarpoq. Inuit Ataqatigiinniit partiit allat eqqarsaatiginneqqinnissaanik, nunatsinnilu akiliutaasartumut isumaqatigiinnissarput siunertaralugu pingajussaaneerneqannginnerani ataatsimiititaliamit suliareqqinneqarnissaanik inassuteqaqueqqullugit qinnuigerusuppagut.

Siunnersuut Inatsisartunit itigartinneqassasoq **Aningaasaqarnermut Ataatsimiititaliami ikinnerussuteqartut Inuit Ataqatigiit ilaasortaatitaasa inassutigaa.**

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.

---

Jens Immanuelen,  
siulittaasoq

---

Steen Lynge

---

Jess Svane

---

Tillie Martinussen

---

Naaja Nathanielsen

---

Sara Olsvig

---

Peter P. Olsen